

SCRIPT OF MORNING GOJRI NEWS BULLETIN 18APR 2026 1015HRS

مارنگ گوجری نیوز بولیٹن 18 اپریل 2026

\*\*\*\*\*

یوہ آکاشوانی جموں ہے، باغ علی طاہر تیں خبر سُنو۔

\*\*\*\*\*

LS WOMEN RESERVATION

پارلیمنٹ گا ایوان زیریں یعنی لوک سبھا مانہہ پیش کیا گیا 131 واں ترمیمی بل 2026 اتہہ منظوری نئیں مل سکی ہے۔ واضح رہے اس بل نانہہ پیش کیا جان غو مقصد لوک سبھا تے ریاستی قانون ساز اسمبلیاں مانہہ خواتین نانہہ اک تہائی نمائندگی مہیا کرانو تھو۔ اس بل غی منظوری غی خاطر ایوان غی کُل 528 ممبراں وچوں 352 ممبراں غی حمایت درکار تھی۔ ووٹنگ غے دوران بل غا حق مانہہ 298 ممبراں پارلیمنٹ نے ووٹ دتا جد کہ بل غے خلاف 230 ووٹ پایا اس راہ بل غی منظوری غی خاطر درکار دو تہائی اکثریت حاصل نہ ہو پان غی وجہ نال لوک سبھا مانہہ یوہ بل منظور ہو گیو ہے۔ لوک سبھا غا سپیکر اوم برلا نے بل ور بوئی ووٹنگ غا نتیجہ غو اعلان کرتا واں کہیو جے اس بل نانہہ اگے بدھان غو امکان بُن ختم ہو گیو ہے۔ کیونجے لوک سبھا مانہہ یوہ بل منظور نی بوسکیو ہے۔ اس غے بعد پارلیمانی معاملن گا وزیر کرن رجیجو نے کہیو جے دوجا دع بل یعنی حد بندی بل 2026 تے مرکزی زیر انتظام علاقن غا قوانین بارے ترمیمی بل 2026 وی 131 ووں ترمیمی بل سنگ ہی منسلک این۔ لہزا ان نانہہ بُن منظوری غی خاطر ایوان مانہہ پیش نی کیو جائگو انہاں نے خواتین نانہہ لوک سبھا تے ریاستی قانون ساز اسمبلیاں مانہہ تخصص مہیا کران غو موقعو ضائع کرن ور حزب اختلاف ور الزام لایو ہے۔

\*\*\*\*\*

LG SARIAH

لیفٹیننٹ گورنر منوج سنہا غو کہنو ہے جے قومی سلامتی بنہ ور کھلا فوجی جواناں تے سرحدی علاقن غا بسنیکاں غی وجہ نال ہی محفوظ ہے۔ وے کل

راجوری غا سرباه گراں غا اپنا دورہ غے دوران اک عوامی اجتماع سنگ خطاب کرربیا تھا جت اُنہاں نے اک مشترکہ خدمت مرکز غا افتتاح تیں علاوہ کئی ترقیاتی پروجیکٹ شروع کیو۔ اُنہاں نے اس موقع ور برگیڈیر شہید محمد عثمان نانہہ وی خراج عقیدت پیش کیو۔ اس موقع ور بولتا واں لیفٹیننٹ گورنر نے زور دتو جے سرحدی گرایاں غی ترقی، قومی سلامتی تے خوشحالی واسطے بڑی اہمیت رکھے۔ اُنہاں نے مزید کہیو جے قوم اُس گا دور دراز تے ملک غی شناخت دُنیا ور ظاہر وے۔

\*\*\*\*\*

### CM EVENTS

وزیر اعلیٰ عمر عبداللہ نے کل جموں مانہہ شیر کشمیر کرکٹ کلب غی جرسی غی نقاب کشائی کرتا واں کلب غی طرفوں کرکٹ نانہہ فروغ دین ور اُن غی تعریف کی ہے۔ اس موقع ور بولتا واں وزیر اعلیٰ نے کہیو جے سرکار کھیڈ سرگرمیاں غی حوصلہ افزائی تے جموں کشمیر مانہہ نوجوانان غی صلاحیتاں نانہہ بایدو دین غی خاطر ہر ممکن امداد مہیا کران غی پابند ہے۔ اس موقع ور وزیر اعلیٰ غا صلاحکار ناصر اسلم وانی وی موجود تھا۔ اس توں پہلاں وزیر اعلیٰ نے جنگلاتی زندگی بارے اک میگزین غو اجراء وی کیو۔ جس غو عنوان چک لسٹ آف ماملز آف جموں اینڈ کشمیر انڈیا رکھیو گیو ہے۔ اس موقع ور مظفر کچلو غی قیادت مانہہ ماہرین ماحولیات غا اک وفد نے اس سلسلہ مانہہ جاری پروجیکٹاں بارے وزیر اعلیٰ نانہہ جانکاری مہیا کرائی۔ وزیر اعلیٰ نے اُن غی کوششاں غی سراہنا کرتا واں جموں کشمیر غی امیر حیاتیاتی رنگا رنگی غا تحفظ تے تحقیق غی ضرورت ور زور پایو۔

\*\*\*\*\*

### JK AWARDS

جموں کشمیر نے سادھنا سپتھ غے دوران مشن کرمايوگی غے تحت قومی سطح ور تیجی پوزیشن حاصل کرتا واں انتظامیہ گا افسراں غی صلاحیتاں نانہہ فروغ دین مانہہ اک برو سنگ میل حاصل کیو ہے۔ یاہ حصولیابی، آئی۔ جی او ٹی کرمايوگی پلیٹ فارم غو استعمال کرتا واں عوامی خدمات غا شعبہ

مانہہ قومی پروگرام غی موثر عمل آوری نانہہ ظاہر کرے۔ اس پروگرام غے تحت دو لکھ تیں متا ملازماں نانہہ شامل کیو گیو۔ جس غے دوران اے۔ آئی سمیت 4 لکھ تیں متا کورس مکمل کیا گیا، یوہ ایواڈ وگیان بھون نویں دلی مانہہ مرکزی وزیر ڈاکٹر جتندر سنگھ تیں حاصل کیو گیو۔ اک قابل ذکر حصولیابی غا طور ور جے۔ اینڈ کے انسٹیچوٹ آف منیجمنٹ عوامی انتظامیہ تے گرائیں ترقی نانہہ تمام محکماں مانہہ صلاحیت پیدہ کرن غا منصوباں، سی۔ بی۔ پیز نانہہ کامیابی سنگ مکمل کرن آلا ملک غا پہلا ادارہ گا طور ور اُبھر غے باندے آن ور خصوصی ایواڈ سنگ نوازیو گیو ہے۔

\*\*\*\*\*

#### SATISH METROLOGY

جموں کشمیر یو ٹی غا وزیر ستیش شرما نے کل محکمہ ناپ تول غی اک میٹنگ غی صدارت کرتا واں سارفین گ اتحفظ تے عمل آوری غا اکماں گو جائیزو لیو۔ اُنہاں نے افسراں نانہہ بازاراں گا معانہ غی ہدایت کرتا واں کہی و جے ناپ تول غا معیار ور سختی سنگ عمل کرایو جے اُنہاں نے افسراں نانہہ ہدایت کی ہے جے وے پٹرول پمپاں غو چان چک معائنو کرتا واں ایندھن غی دستیابی مانہہ ممکنہ ہدیانتیاں ور روک لاویں۔ تے ذمہ داراں غے خلاف سخت کاروائی کی جے وزیر موصوف نے میٹنگ مانہہ افسراں نانہہ یاہ وی ہدایت کی ہے جے بڑا پیمانہ ور دُکاناں غو معائنو کرتا واں ٹیکنالوجی غا بہتر استعمال تے صارفین مانہہ بیدادی پیدہ کرن غی کاروائیاں مانہہ تیزی آنی جے۔ اُنہاں نے فراڈ تے بے ضابطگیاں غے خلاف صفر برداشت غی سرکار غی پالیسی نانہہ دہرایو ہے۔

\*\*\*\*\*

#### HAJ FLIGHTS

جموں کشمیر حج کمیٹی نے اعلان کیو ہے کہ 2026 واسطے سرینگر تیں حج پرواز اج یعنی 18 اپریل تیں شروع وے غی۔ آکاشوانی جموں گا نمائندہ غے مطابق، پہلے تہاڑے 3 پرواز روانہ ویں غی۔ تمام عازمین نانہہ ہدایت دتی گئی ہے کہ وہ اپنا مقررہ وقت غے مطابق، حج ہاؤس بمنہ سرینگر مانہہ رپوٹ

کریں۔ کمیٹی نے کہیو ہے کہ تمام لوک مقررہ وقت تے سامان غا اصولاں ور عمل کریں تانجے روانگی غو عمل آسانی نال مکمل کیو جاسکے۔ اس سال جموں کشمیر تیں 4 ہزار 7 سو 4 عازمین حج غی ادائگی واسطے روانہ ویں گا۔

\*\*\*\*\*

## WEATHER

محکمہ موسیماں غے مطابق اج تیں 19 اپریل توڑی موسم جزوی طور ور ابرآلود تیں مکمل طور ور ابرآلود رے غو تے بکھ بکھ مقامات ور رُک رُک غے ہلکی بارش تے گرج چمک غے نال بارش ہو سکے۔ اس دوران گُجھ اُچا مقامات ور تیز ہوا تے آناس پین غا امکان ہیں۔ تاہم 20 اپریل تیں 24 اپریل توڑی موسم زیادہ تر خشک رے غو۔ حُکام نے لوکاں نانہ مشورو دتو ہے کہ خراب موسم غے دوران احتیاطی تدابیر اختیار کریں تے خاص طور ور ان علاقاں مانہ ضروری حفاظتی اقدامات کریں، جت تیز ہوا تے آناس غو خطرو ہے۔

\*\*\*\*\*